

TE HEHEURAA API

I Neia I Te Piha Neneiraa A Te Ekalesia A Iesu Mesia I Te
Feia Mo'a No Te Mau Mahana Hopea Nei, I Papeete,
Tahiti, I Te Mau Fenua Sotaiete, I Te Mau
Ava'e Atoa.

Te hoo: EPiti Toata i te Matahiti.

Nu. 8

Atete 1934


Mat. 28

*E ao to te taata i mata'u ia Iehova; o tei haapao i to'na
ra mau e'a. E amu oe i ta to rima i ohipa ra: e ao to oe,
e e manu'ia ta oe. E riro to vahine mai te vine hotu i to oera
pae fare; e to mau tamarii, i te haatiraa i ta oe ra amuraa,
mai te ohi olive ia.*

Tihoti F. Ritade

Ua fanau mai Tihoti F. Ritade i te 23 no Febuare i te
matahiti 1861 i roto i teoire Farmington; Utaha. E tama-
iti oia na Frankli W. Ritade (peretiteni no te mau apotesoro
e te papai parau tuatapapa no te Ekalesia i te taime i pohe
ai oia e Nancy L. Ritade.

Ua haere Tihoti Ritade i te haapiiraa e i te matahiti
1861 ua mahuti mai oia na roto mai i te haapiiraa rahi no te
fenua. Ta'na ohipa matamua o te ohipa papai parau ia no
te hoê Sotaiete pereoo auahi e i muri a'e ua faarue oia i te
reira ohipa, e ua hoo mai oia i te hoê faapû puaatoro, e ua
manuia roa oia i roto i taua ohipa ra, e ua tamau oia i te reira
ohipa e tae roa'tu i te taime i maiti hia ai oia ei Aposetolo no



TIHOTI F. RITADE

te Ekalesia, oia hoi i te avae Epelera 1906. I te matahiti 1916 ua maiti hia oia ei peretiteni no te Mitioni, no te Ekalesia, i te fenua Baratane e ua faatere maitai oia i te ohipa i reira e tae roa'tu i te matahiti 1919.

Ua tauturu oia i te faatere raa i te mau ohipa no te Hau. Ua rahi te mau ohipa tei horoa hia na'na ia rave.

E taata itoito roa teie taeae, eita e nehenehe ia'na ia parahi i raro ma te rave ore i te ohipa, e ta'na faatere raa e mea nehenehe ua faataahia te mau hora no tera ohipa e te tera ohipa, e ua faataa hia atoa te mau hora no te hauti i ta'na mau tamarii, e taata ite roa oia i te hauti tairi popo e te golf.

Te taime i pohe ai Anatone H. Luna ua maitihia Tihoti F. Ritade ei peretiteni no te Hiero i Roto Miti, e ua tupu roa teohipa te rahi raa i raro a'e i ta'na faatereraa.

Ua maiti atoa hia ta'na vahine ei tauturu eia faatere i te mau tuahine tei haere i roto i te Hiero.

Ua faaipoipo Tihoti F. Ritade ia Alue a Robinson i te i te 9 no Mati i te matahiti 1862 e ua fanau mai ia rana e 15 tamarii, e te ora nei 13 e too 5 tamarii tamaroa e too 8 tamahine.

Ua haere teie mau tamaiti e too pae ia porohaere i te Evanelia e ua hoi faahou mai ratou i to ratou iho fenua e ua riro ratou ei mau taata maitatai no te fenua, e roo maitai to ratou i te mau vahi atoa. E ta rana mau tamahine ua oti ratou i te faaipoipohia i roto i te Hiero, e te haapao nei ratou i te mau haapiiraa i haapiihia ia ratou e to ratou na metua.

E na oraraa nehenehe teie ora raa o to tatou taeae e to tatou tuahine. Ua haapao rana i te ture matamua ta te Atua i horoa mai i te taata i nia i teie nei ao oia hoi, *Genese 1:20*

Ua fanau mai ia rana i teie mau tamarii nehenehe, e

na roto i to raua aroha e to rana here e na roto i to raua itoito i te haapiiraa atu ia ratou i te mau ture e te mau parau a te Atua, e te mau ture no te fenua ua riro ratou ei mau taata herehia e te taata nei, e te Atua.

Tihoti e ta'na vahine o Alie, ua haere raua na te purumu afaro i roto i teie nei ao, areara ua farerei raua i te peapea e te ati, ua ite raua i te oto e te oaoa, no'atu ra i te reira, ua tiaturi raua i te parau a to tatou Atua e ua tamau â raua mai te au i te himene nnmera 62.

1

2

Ia apí te e'a, eiaha e fiu.	Tiaturi noa ia Iesu, eiaha e fiu,
Ia i te peapea, noa'tu;	Mo'e-ore-hia matou
Te ao teie e oto ai,	E a muri noa'tu;
Te vai ra te ao maitai,	E Iesu e te Fatu,
To tatou ora e raupa,	Eiaha e Fiu.
Eiaha e fiu.	

Faahoiraa:

Eiaha e fiu i te horo,
 Noa'tu i to tufaa;
 'Tera'tu te ao maitai,
 No teie ora e hemo ra.

E teie nei ua paari raua, e e mea poto to raua mahana toe i nia i teie nei ao, area ra ua tae raua i nia i te mou'a i te vahi teitei e te hi'o atura te mau taata ia raua ma te aroha e te here, aue te oaoa e te poupou i roto i te aau ia ite mai raua i ta raua mau tamarii i te haere raa na te purumu i haapii hia e tei haerehia e raua.

Aue te Oaoa e te hau e tupu i roto i to rana aau ia tae

raua i te hopea o to raua haere raa i roto i teie nei ao e ia tae te mahana e vaiho ai raua i to raua tino i ô nei, e ia paran mai te Mesia ia raua. *Ua na ô atura ta'na fatu ia'na, Ua tia roa, e teie nei tavini maitai e te haavare ore; o oe i haapao maitai i tena na tao'a iti haihai, e faatiaau atu rau ia oe i nia hoi i te mea rahi: e haere oe i roto i te oroa oaoaraa a to Fatu. Mataio 25:21.*

Papaikia e Leroi Marori

Te Mahana Mo'a "O Te Faufaa Api"

"Iesu i te mahana pae". "Mahana pae"

1. Tei mua oia i Pirato,
2. Ua aratai hia i mua ia Heroda,
3. Tei roto oia i te Peraitorio.
4. Ua aratai hia oia i Toratota.
5. Ua faatatauro hia oia,
6. Ua pōiri te mahana e ua pohe.
7. E ua tanu hia oia, i roto i te Menema.

"Mahana Maa"

Te roto oia i te Menema.

"Te Sabati"

Tei roto â oia i te Menema mai ta Luka i faaite mai. Luka 23:56.

I te "Aahiata o mahana. "Mahana o te hepetoma"

"Ua tiafaahou mai oia".

Te mau mea i tupu i te mahana matamua o te hepetoma ra.

E itea noa hia ia ia taio i te pene 28 no Mataio.

E te pene 16 no Mareko

E te pene 24 no Luka.

e te pene 20 no Ioane.

E ia hope teie mau pene ia oe i te taio hia, ite papu atura oe i te mau mea i tupu i te mahana matamua o te hepetoma ra, taa-maitai atura te mana'o e; E mahana taa'e mau te mahana matamua o te hepetoma.

E temeio rahi mau tei rave hia i taua mahana ra;

“Ua faatia mau hia o Iesu e te mana o te Metua i te pohe raa ra.”

Ua parare te reira parau apî maere rahi. Eiaha hoi e, i ô te mau Apotesolo anà'e ra, Ierutarema atoa râ. E ua tae roa atoa te reira parau i te fare o Pirato. Eiaha hoi e i reira ana'e ra. Ua tae roa râ i nia i te ra'i no te mea, ua haere o Iesu e farerei i to'na Metua i nia i te ra'i.

Mai ta'na ihô i faaite a'e ia Maria i magdala.

E ua pupu hia mai te mana o te ra'i e te ao atoa nei, ia Iesu i taua mahana ra.

E ua hoi mai oia e parau i te mau Apotetoro i te ahi-ahi o taua mahana ra. E ua tuu maira oia i na parau e toru i taua farerei raa ra, a putuputu noa ai te mau Apotetoro i roto i te piha ta'na i faatia i te Oroa “pata” ra, ua fâ maira oia, tia noa maira i rotopu ia ratou (nao'atura) Ia ora na outou ua faaite atura ia ratou i te puta auri i to'na na rima e te puta i to'na aoao. “E ia oti a'e ra te reira”. Ua na o faahou atu ra. “Ia ora na outou” Mai ta'u Metua i tono mai ia'u nei; e tono atoa atu vau ia outou (E oti aera te reira)

Ua haapuaj atura i te aho ora i nia ia ratou, “na ô atura” a faarii mai i te Varua maitai. O ta outou e faaore i ta ratou hara ra ua faaore hia ia, e ta outou e vaiho i ta ratou ra, ua vaiho hia ia “O ta Ioane teie i faaite” Ioane 20 10-23.

No reira faariro atura te mau Apotetoro i te mahana matamua o te hepetoma ei mahana mo'a no te faufaa apî mai te au i te hoê mana taa ê ta Iesu i pupu atu ia ratou. Mataio 18:18. Ua faariro atura te mau Apotetoro i te reira ei mahana mo'a vavahi raa pane.

E ia tae atoa i to te Ekalesia mau haaputuputu raa i taua mahana mo'a ra, e vaiho ratou i te tahi pae moni ei tauturu raa'tu i te feia mo'a vevê i Ierutarema ra 1 Korinetia 16 1.2.

Te râ te ioa i mairi hia i nia i taua mahana mo'a ra.

((Oia hoi) Te mahana o te Fatu. Ua riro Ioane i te varua i roto i taua mahana mo'a ra mai ta'na iho i faaite mai. Apokalupo 1;10. Ua afai hia oia i nia i te ra'i, e faaite i te mau mea hanahana roa, Apokalupo 4:12. Ua heheu hia mai te reira mahana ia Iotepha. B. F. 59:9-12.

I te tae raa mai o Turuati ma i Tahiti te hahpao nei to Tahiti ma i te mahana mo'a o te faufaa. Ua huri ra oia i te reira e ua tuu i te haamo'a raa i nia i te mahana matamua i te hepetoma mai tei heheu hia mai ia Iotepha, mai reira mai e tae roa mai i teie nei, e amuri noa'tu.

Papai hia e Toae á Maire

Na Huru e Piti Nei.

Epiti ia huru roto-papa e vai nei i te fenua Ierusalem e i te fenua Utaha atoa hoi.

Te hoê ra, e roto-pape ora maitai ia. E mea mitimiti ore ia. Te tahi, e roto-pape miti pohe ia.

E mea au ia tatou nei, e hiopoa maitai i te huru o na roto-pape e piti ra.

Te roto-pape matamua ra, e mea tauturu rahi roa ia i te taata ra i to'na oraraa nei, no te mea, te horoa nei ia roto, i te pape maitai e au ia inuhia. Tei roto hoi i taua roto-pape ra, te mau huru i'a e rave rahi, ei maa na te taata nei. Te haere noa nei te mau taata e rave rahi i taua roto-pape ra i te ravaai. Roaa mai ihora ia ratou ra, te tahi mau i'a ei maa. Te roto-pape i Ierusalem e parauhia nei o Galilea ia, to'na io'a. E te tahi i Utaha, ua parauhia ia te roto-pape Utaha.

Te aratai faatahe nei te mau taata i taua pape maitai ra i nia i te mau fenua păpă-mărô ra, e riro ihora ia fenua i

te faahotu mai i te mau huru huero e te mau huru hotu maitatai atoa ra. No taua pape ora i faariro i te fenua medebara ei fenua ruperupe e te nehenehe. No te mea, e ora to roto i taua pape ra, i riro ai ia ei haamaitairaa rahi roa i te fenua nei. E aroha to roto i teie nei pape, e te horoa noa nei ia aroha i te mau mahana atoa ra, o te mea ia i maitai ai.

Te roto pape piti ra, ua parauhia ia te Roto Miti i te fenua Utaha nei, e i te fenua Ierusalem, ua parauhia taua huru roto-pape ra te Miti pohe.

Aita ia huru pape e maitai ia inu. Aita hoi ia e au no te faaapu, e pohe te mau huru raau e te mau hotu i te reira, e ia tuuhia te i'a i roto i taua pape miti ra e pohe roa i hora ia.

Aore roa e ora o roto i taua pape miti ra, area ra, e pohe to reira. Aita e faufaa i te taata nei, e aita hoi ia o faufaa i te mau puua e te mau manu o te reira. E mea pohe iho a ia.

Eaha te mea i riro ai ia ei miti pohe? O teie ia, oia hoi, te farii noa nei ia roto-pape i te mau anapape rii maitai, o tei tahe mai, mai nia mai i te mau mou'a ra, e te farii atoa nei ia roto-pape i te ua, no nia mai i te ra'i mai. Tera ra, te tapea nounou nei ra ia roto-pape i taua mau mea maitai ra, ma te horoa-ore i te tabi tufaa iti nainai na te taata e na te mau puua e ua te fenua pāpā mārō ra. E no reira, ua rahi te miti i roto i taua pape ra, riro i hora ia emea vari roa e te faufaa ore.

E piti ia huru taata i te ao nei, te matamua ra, o te taata aau aroha ia. E te piti ra, o te taata aau nounou ia.

Te farii noa nei na huru taata e piti ra, i te mau haamaitairaa e rave rahi, no o mai i te Atua ra. Te tapea nei te tahi, i taua mau haamaitairaa ra na'na iho. Te i roa nei

to'na aau i te fei e i te nounou e i te haru, e i te piri taoa, e i te horoa ino, e i te rima puu, e i te aroha ia'na iho, e i te haapaoraa ia'na ihoa ana'e ra, e i te haamana'o ore i te Fatu. Aita ia huru taata e anaanatae i te poipoi ra, a hi'o atu ai oia ra i te hitiraa o te râ. Aita oia e haamaitai i te Atua no te ora, e no te maa, e no te pape-inu e no te tino ma'i ore, ta te Fatu i horoa mai na'na i te mau mahana atoa ra. E nounou râ to'na na'na iho te maa e te fenua e te tao'a atoa hoi o ta'na ra taata tupu. Aore to'na e aroha i te taata veve e i te taata pohe i te ma'i, e i te feia paruparu, e i te vahine ivi, ei te Ekalesia ra. Te tapiri nei oia i te mau mea atoa ra na'na iho. Hoê â ia huru to'na e i to te Miti pohe ra. E tavini mau ia oia no Satani, e e tavini mau ia oia no te pohe.

E te tahi huru taata, eaha ia to'na huru ra? E aau maru aroha to'na. E himene haamaitai hoi to'na i roto i to'na ra aau i te mau mahana atoa ra. Te haamaitai nei oia i te Fatu no te mau mea aroha ta'na i farii i te mau mahana atoa ra, oia hoi no te ora e no te maramarama, e no hitiraa o te râ, e no te maru o te pó, e no taotoraa, e no te araraa i te poipoi ra, e no te maa, e te pape. E ua mauriuru roa oia no ta'na ohipa i rave e no ta'na Taata tupu, e no te mau taihaa e te taoa ta te Fatu i horoa mai na'na, e mea iti noa'tu. E feia pohe i te ma'ii ó ia'na ra, ua na mua oia i te tauturu aroha atu ia ratou ra. E e feia veve to'na taata tupu, ua namua oia i te tauturu atu i te maa e te ahu. E e feia pohe i te ma'ii ó ia'na ra, te haamaitai atu nei ia oia ia ratou ra.

Hoê ana'e ia huru to taua taata maitai ra, e i to te roto-pape ora maitai ra. E aroha, e e ora hoi o roto ia raua ra. E tavini mau ia huru taata no te Fatu. Te haapao nei ia taata i na ture e piti, i parauhia e Iesu, oia hoi. "E hi-naaro oe i to Atua ia Iehova ma to aau atoa, e ma to varua

atoa, e ma to mana'o atoa. O te ture matamua teie e te hau i te rahi. E mai te reira atoa te piti; E aroha atu oe i to taata-tupu, mai to aroha ia oe iho na. Te ture atoa a te mau peropheta, tei teie nei pue ture e piti nei." Mataio 22;40.

No roto mai i te buka Roma, te papu mai nei ia tatou i te tahi atu â parau no te aroha. Te na ô maira te Aposetolo e, "Eiaha outou ei amu tarahu na te taata atoa, area ia aroha'tu te tahi i te tahi, o tei aroha'tu hoi ia vetahi ê ra, ua haapao ia i te ture. O teie hoi e, eiaha oe e faaturi, Eiaha oe e eiâ, Eiaha oe ei ite haavare, Eiaha oe e nounou, e te vai nei te tahi ture, ua hope atoa ia i roto i teie nei parau e, E aroha atu oe i to taata-tupu mai to aroha ia oe iho na. E ore roa te aroha e hamani ino i te taata tupu; te au ra maori te aroha i te ture. Ua poto roa te rui, ua fatata roa te ao; e teie nei e haapae atu tatou i te man ohipa o te pouri, e ahui tatou i te ahui o te ao. Ei haere nehenêhe to tatou mai te haere ao ra, eiaha ma te hori ra, e te faataero ra, eiaha te parau faufau, e te taiata ra, eiaha te mârô e te feii ra. E tuu râ outou i ta te Fatu rata Iesu Mesia i nia iho ia outou, e e eiaha e faaitoito i ta te tino hinaaro." Roma 13: 8-14.

Ia i roa to tatou nei mau aau i te aroha i te Fatu, e i te aroha atu i to tatou nei taata-tupu, o te hinaaro mau ia o to taeae i te faaroo nei.

Pupaihia e Anederea Sedamaia. Porovo Utah

Te Mau Parau Api.

Ua tae rana i New-York.

I te 28 no te ava'e Me i mairi a'enei ua faarue na taata Farani faatere pahi reva ra o Maurice ROSSI raua o Paul CODOS, i te oire ra o Paris, Farani, na nia i to raua pahi reva o "Joseph LEBRIX" no te haere roa'.

tu i te oire ra o San- Francisco, Amerika. No te tupuraa te hoê peapea i nia i to raua pahi reva ua tapae oioi atura raua i te oire ra o New-York, Amerika, no te hi'oraa e eaha te vahi ino i to raua pahi reva. I te reira taime, a haere mai ai raua i raro, na tere raua e 3.700 maile i roto i na hora e 38 e e 28 minute, e te inoa ra to raua pahi reva i te mori e e navai roa te reira no te haere roa'tu i San-Francisco. I to raua pouraa mai, no nia mai i to raua pahi reva, teie ta raua parau: "Aita roa maua i mauruuru no te mea aita i tia ia maua ia haere roa'tu i te vahi tei opuahia e maua, oia hei, i te oire ra o San-Francisco, i te tooa o te râ o te fenua Amerika,

E tapaparaa no te ora.

I te 23 no te ava'e Me i mairi a'enei, ua faarue e piti pahi reva i te oire oa o Balboa, Panama, ma te taote i nia iho, no te haere e imi i te taata ra ia William A. ROBINSON, i nia i to'na poti ra o Swap, o tei vai i tua i te motu ra o Galapagos, no te mea te pohe ra taua taata o ROBINSON i te hoê ma'i ino roa e aita'tu e ravea e ora'i maori ra ia tapuhia. No reira i tonohia'i te taote na nia i te pahi reva no te tamataraa ia faaora ia'na. E i roto i te ve'a no te 25 no Me ua faaitohia e, ua iteahia taua taata ra e te mau pahi reva e ua afaihia oia i Balboa, ma te maitai, no te tuuraa ia'na i roto i te hoê fare ma'i.

Oro'a no te 50 o te matahitiāraa.

Ua faat-rehia, ite 18 no te ava'e Me i mairi a'enei, te Oro'a ao te pae ahuruāa o te matahiti no te faatiraahia te Hiero no LOGAN, Utaha. Ua faaterehia taua Oro'a rahi hanahana ra i mua i te aro o na taata e 1.500, e tei rotapu ia ratou te mau Feia toro'a rarahi no te Ekalesia a Iesu Mesia.

I taua mau mahana ra na faaterehia te tahi mau hoho'a tei faaite mai i te huru no te mau ohipa i ravehia, e 50 matahiti i mairi a'enei, e te mau taata tei patu i taua hiero ra. I taua Oro'a rahi ra, na tae mai te tahi mau tanta tei rave i te ohipa no te paturaa i taua Hiero ra e tei rave i te ohipa i roto ra, e ua i ratou atoa i te oaoa.

E taata manuia mau.

Te faaitēhia nei i roto t te hoê ve'a, e taata manuia roa te taata ra o Julian J, JONES no te mea e 4 taime to'na fatataraa i te pohe.

I te matahiti 1898 ua farerei oia i te hoê ati matai e te fare ta'na i parahi i te reira tau o te fare ia tei toe i roto i to'na oire parahiraa, no te mea ua parari te taatoaraa i te matai.

I te tahi mau matahiti i muri iho, ua haere oia e pupuhi haere i te manu oviri i roto i te uru raau, e i te tahi taime a rave ai oia i te hoê manu ta'na i pupuhi, ua tuu atu oia i to'na rima i pihai roa iho i te afii o te hoê ofi taero roa e ua fatata roa oia i te hohonihia.

I te hoê mahana te haerenoa ra cia na nia i te purumu, e inaha, ite ihora i te hoê mea i te ūraa mai, pee atura oia i nia, e i to'na toparaa, topa tia'tura oia i nia i te tapoi machine o te pereoo uira tei ū i nia ia'na, e i te reira taime aita oia i pēpē, e i te mauraa o te pereoo uira mairi ihora oia i nia i te purumu e pahurehure ihora oia.

Te maha o to'na manuiaraa, teie ia: te parahi ra oia i roto i to'na pereoo uira, i raro a'e i te hoê tumu raau, no te puai o te ua, e a vai noa'i oia i taua vahi ra topa maira te uira i nia i taua raau ra ma te hohore i te paa o taua raau ra e te haere roa'tu i roto i te repo, e i reira tere atura te uira na nia i te aa o taua raau ra e ou'a'tura i roto i te pereoo uira, na te maramarama i muri e mairi ihora i nia i te taponō o taua taata ra e, mai i reira haere roa'tura i roto i te hoê pupuhi tei vai i nia i te tahua o te pereoo uira. Tera ta'na parau no te reira: " Aita roa vau i mauui e aita hoi i ve'ave'a. " E taata manuia mau teie nei taata, no te mea e 4 taime to te pohe haapahereraa ia'na.

LOUIS DROLLET Gérant

L. R. MALLORY Imprimeur.

Rue Dumont d'Urville, Orovini, Papeete, Tahiti.

